



Selasa, 28 September 2021
Ogen : 1 Petrus 5:10-11



Serta Ibadah Dibata



Tupung Burung Elang ngajari anakna gelah beluh kabang, ibenakenna alu encedaken sarangna. I bas sarang e anakna nggeluh aman, sikap ras ndauh arah serangan musuh. Tapi labo mejile adi lalap ia bas sarangna. Seh paksana ia arus erlajar kabang. Maka banci kabang, anak Elang e arus ndarat arah zona aman. Ia arus ngalaken perbeben. Isontarken nandena sarangna e atena gelah anakna e kabang. Adi lanai lit ingan si aman me arus ia kabang. Anak Elang e labo mis beluh, naktak kang ia tupung kabang bas dahan batang kayu e nari. Iangkat nandena ka ia, ibabana terganjangan, e maka lepaskenna ka, ngadi-ngadi ia beluh, bage lalap bahan nandena. Sura-sura nandena, anakna e ngasup kabang sekalak, amin pe ku bas ingan si meganjang. Situhuna reh ganjangna kabang reh derasna nge angin si man alanken tapi ngasup ia ngalakensa sabap enggo tehna njaga keseimbangan tubuhna.

E sada gambaren kegeluhen kalak Kristen, i bas ngaloken kemulian Kristus la banci lang arus ndarat i bas zona aman nari. Banci saja sedekah enda enggo aman siakap bas inganta erdahin, entah bas rumahta alu la emperdiateken kalak si deban. Nggeluh kita alu sada prinsip, 'kam la ku ganggu, aku pe ula ganggundu.' Tapi guna nuduhken kita e enggo dewasa, arus kita ndarat i bas kebiasaan si ndekah, lako emperdiateken kai si lit i sekelewetta. Perlu kita bengket ku jelma si enterem, ku tengah-tengah masyarakat, i je situduhken kebujuren, keadilan ras keleng ate. Tentuna melala nge tantangan ras kiniseran. Adi erbahan bujur, enterem ka nge temanta jadi imbang. Reh pangna kita nuduhken kebujuren, reh galangna ka si iblis e nerang kita. Tapi perlu si inget, kentsik nge ngenca kita i bas kiniseran e. Labo ipediat Tuhan kita sekalak ngalaken kiniseran e, iarak-arakNa, iberekenna gegeh, seh kita serta i bas IA.